



## JUDICIAL SYSTEM MONITORING PROGRAMME

### PROGRAMA DE MONITORIZAÇÃO DO SISTEMA JUDICIAL

*Komunikadu Imprensa*

*Periodu: Abril 2011*

*Edisaun: 14 Abril 2011*

#### **Kazu omisídiu hasoru nia konjuje ameadu ho pena tinan 15 prizaun**

Iha loron 12 Tribunál Distrital Dili hala'o julgamentu kontinuasaun hodi rona deklarasaun husi testemuña ba kazu omisídiu hasoru kónjuje. Kazu ne'e rejistu ho numeru prosesu 34/C.ord/TDD/2011, ne'ebé involve husi arguidu CX hasoru lezada F nu'udar arguidu nia kaben. Kazu ne'e akontese iha Suco Estadu, Distritu Ermera iha loron 16/08/2010.

Julgamentu ba Kazu ne'e prezide ho kompozisaun husi Juiz koletivu ne'ebé lidera husi : Juiza Rosa Brandão, Juiz Antonio Fonseca no Juiz Jose Goncalves. Husi parte Ministériu Públiku, representa husi Dr. Domingos Barreto no arguidu rasik hetan assistensia legal husi Dr. Jose da Silva no Dr. João Carvalho husi eskritoriu Defensória Públika.

Diretór JSMP Luis de Oliveira Sampaio haktuir katak *"Kazu omisídiu ho sirkunstansia kuandu ajente ne'e iha relasaun familia ho vitima en termus konjuje, dexendente ka asendente, koletareral ka seluk tan, ne'e nu'udar krimi seriu ne'ebé mak ho moldura penal tinan 12 to tinan 25 iha prizaun. Tambá ne'e husu ba tribunál atu bele fó pena ne'ebé mak realistiku ba hahalok ne'ebé mak arguidu komete.*

Bazea ba kronolojia kazu ne'ebé mak haktuir husi Ministériu Públiku katak, kazu ne'e akontese iha suku Estadu, distritu Ermera iha loron 16/08/2010, wainhira iha dezentendimentu entre arguidu ho lezada kona-ba osan ne'ebé mak lezada deve husi ema seluk. Husi dezentendimentu ida ne'e, arguidu duni lezada ho katana no konseje ta'a lezada to mate.

Bazea ba produsaun provas iha tribunál, iha alegasaun final, Ministériu Públiku akuza arguidu ho artigu 139 (g) Kódigu Penál kona-ba omisídiu agravadu. Maske akuza ho artigu ida ne'e, maibé Ministériu Públiku husu ba tribunál atu hamonu deit pena prizaun tinan 15 ba arguidu.

Aliende ne'e, husi parte defeza mós husu ba tribunál hodi bele konsidera sirkunstansia atenuantes sira durante prosesu julgamentu, hodi bele hamonu pena ne'ebé mak kma'an no merese ba arguidu.

Julgamentu ba leitura akordaun sei hala'o iha loron 02, Maiu 2011, tuku 14.00 Oras Timor Leste.

**Atu hetan informasaun kle'an, favor kontaktu:**

*Luis de Oliveria Sampaio*

*Diretór Ezekutivu JSMP*

*Email: [luis@jsmp.minihub.org](mailto:luis@jsmp.minihub.org)*

*Landline: +670 3323883*